

ԽՈՐԻԿՅԱՆ ՀՈՎՀԱՆՆԵՍ

(ԱԻ)

ՍԱՏՐԱՊԱԿԱՆ ՀԱՅԱՍՏԱՆԻ ՊԱՏՄԱԿԱՆ ԱՇԽԱՐՀԱԳՐՈՒԹՅԱՆ ՍԻ ՔԱՆԻ ՀԱՐՅԵՐ ԸՍՏ «ԱՆԱԲԱՍԻՍ»-Ի

Աքենենյան Պարսկաստանի տիրապետության ժամանակաշրջանի Հայաստանի մասին կարևորագույն աղբյուրը Քսենոփոնի «Անաբասիս» աշխատությունն է: Դատելով Քսենոփոնի տեղեկություններից, հույները պետք է անցած լինեին Կորդոքի՝ կարդուխների երկրի արևմտյան մասով, իսկ արևելյան մասի վերաբերյալ տեղեկություններ չկան: Քսենոփոնը հայտնում է, որ երբ կարդուխները պայման են կնքում դաշտային երկրի սատրապի հետ, որը IX սատրապությունն է. ապա հաղորդակցվում են թե՛ իրենք նրանց հետ, թե՛ նրանք իրենց հետ¹: Չնայած հայերի և կարդուխների թշնամական հարաբերություններին, վերջիններս նույնպես հայկական ցեղ էին²: Հնարավոր է, որ արդեն Ջ.ա. V դարի վերջին ռազմատենչ ու անկախ կարդուխները դուրս էին եկել նաև Տիգրիսի աջափնյակը, ինչը վկայված է Ջ.ա. I դարի դրությամբ³:

Համաձայն Քսենոփոնի, կարդուխների և արմենների սահմանը Կենտրիտես գետն էր՝ ներկայիս Բոհտան-սուն: Եվ, իրոք, գետի հակառակ ափին նրանց սպասում էին Օրոնտասի և Արտուխասի արմենները և մարդերն ու խալդայները վարձկան, որոնք փորձում են արգելել հեղինկներին մտնել Հայաստան: Մարդերի էթնոնիմը պահպանվել է պատմական Հայաստանի աշխարհագրական անուններում: Անշուշտ, դժվար է ասել, թե Քսենոփոնի մարդերը տվյալ ժամանակաշրջանում գտնվում էին Մարդսդիում, Մարդաստանում կամ այլուր: Բայց և այնպես, տվյալ տեղեկության մեջ Արտուխասի հիշատակումը մարդերին կապում է ավելի շուտ արևելյան Հայաստանի հետ: Համենայն դեպս, կարևոր է ընդգծել հաջորդ նախադասությունը. «Ասում էին, թե խալդայներն ազատ են և խիզախ...»: Հետևաբար, մարդերը, ինչպես փասիանները, տառիսները, հեսպերիտները, մտել են Հայաստանի մեջ, իսկ խալդայների ազատ լինելը հաստատվում է Քսենոփոնի այլ տեղեկություններից ևս:

Հետաքրքիր են հույների գետանցման մասին տեղեկությունները: Հույները գետը ծախ կողմում ունենալով. շարժվում են դեպի գետանցը. և մինչև հիշյիստփոսն ու իր զորամասը մտան գետը՝ «Քսենոփոնը վերջապահ զորամասից ամենաթեթևներին վերցնելով իր հետ. ամբողջ թափով ետ վազեց նորից դեպի այն ճանապարհը. որը տանում էր վեր՝ դեպի հայկական լեռները... (Թշնամիները... վախեցան շրջապատվելուց և արագ կերպով վազեցին դեպի գետից վեր տանող ճանապարհը. և հասնելով այնտեղ, բարձրացան լեռը»: Մինչև գետանցումը Քսենոփոնը նշում է. որ «տեսանելի միակ մի ճանապարհ կար. որը վեր էր տանում և կարծես ձեռակերտ լիներ»: Հավանաբար, պատմիչը նկատի ուներ հենց այս ճանապարհը, երբ գրում էր, որ վերջապահ զորամասի հետ «ամբողջ թափով ետ վազեց նորից դեպի այն ճանապարհը, որը տանում էր վեր դեպի հայկական լեռները» և թշնամիներն էլ՝ վախենալով շրջապատվելուց, վազեցին դեպի գետից վեր տանող ճանապարհը, և հասնելով այնտեղ, բարձրացան լեռը: Կարելի է եզրակացնել, որ Քսենոփոնը շարժվել է գետանցման վայրից դեպի հարավ և, եթե տվյալ ճանապարհին արդեն հիշատակված ձեռակերտ ուղին էր, ապա հայկական սարերը նույնանում են Հայկական Տավրոսի հետ:

Հելլեններն անցնում են Կենտրիտեսը Բաղեշ գետի հետ միախառնվելու շրջանից քիչ հարավ և շարժվում Բաղեշ գետի հոսանքն ի վեր. որտեղ «կարդուխների դեմ կռիվների պատճառով գետի մոտ գյուղեր չկային»: Տվյալ դեպքում խոսքը կարող է վերաբերել միայն Բաղեշ գետին, որն ավելի մոտ էր կարդուխներին և որը շատ անգամ էին անցել կարդուխները: Մտածել, որ գետը կարող էր լինել Սալմո ջուրը կամ առավել ևս Քաղիթթը, չի բխում ոչ մի փաստացի հիմքից, քանի որ Քսենոփոնն, անկասկած, կնշեր այս գետերի մասին: Նաև անհնար է, որպեսզի Քսենոփոնը չնշեր բնակավայրերի մասին, եթե հելլենները շարժվեին Բաղեշից արևմուտք. այն դեպքում, երբ հեղինակը հայտնում է, որ գետի մոտ գյուղեր չկային: Եվ, որ ամենակարևորն է, պատմիչը նշում է Տիգրիսի ակունքներն անցնելու մասին: Սակայն Արմենիայում նրանք Տիգրիսը չեն շրջանցել և Բաղեշի ակունքներն էլ նույնացրել են Տիգրիսի ակունքին:

Անցնելով «Տիգրիսի ակունքը», հույները շարժվում են մինչև Տելեբոաս գետը՝ արևմտյան Արմենիա, որի հյուպարքոսն էր Տիրիբագոսը: Տելեբոասի նույնացումը Մեղ կամ Մեղրագետի հետ

կասկածելի է. քանի որ Քսենոփոնը «Տիզրիսի ակունքներից» մինչև Տելեքոաս գետը հաշվում է տասնհինգ փարսախս (շուրջ 90 կմ). որը շատ ավելին է. քան Բաղեշի ակունքներից մինչև Մեղ գետը: Ընդ որում. եթե Տելեքոասը նույնանալի Մեղ գետին. ապա հույները կմոտենային վերջինիս ակունքների շրջանից. որը Քսենոփոնի տեղեկությունից չի երևում: Մեր համոզմամբ. Տելեքոասը նույնանում է Լիզ կամ Լ Կորի ձոր (Բալկանյո, ալթմ` Քյոռսու) գետերից մեկի հետ:

Ելնելով արևմտյան Հայաստանի մասին Քսենոփոնի տեղեկությունից. կարելի է ենթադրել նաև արևելյան Հայաստանի գոյությունը, որի հյուսիսարևմտյան թերևս Օրոնտասի հետ հիշատակված Արտուխասն էր: Քսենոփոնի տեղեկությունները հաստատում են միասնական երկրի գոյության մասին, որտեղ, հավանաբար, շարունակում էր պահպանվել թագավորական հին դինաստիան, որի ներկայացուցիչները երբեմն նաև սատրապներ էին: Այդպիսին էր նաև Օրոնտասը` պարսից արքայադստեր ամուսինը և Հայաստանի տիրակալը, որին Քսենոփոնը սատրապ չի համարում և գրում է, որ Հայաստանին իշխում էր Օրոնտասը: Սա հավանաբար, ցույց է տալիս, որ Օրոնտասը և՛ թագավոր էր, և՛ սատրապ: Արդ, որոնք էին արևմտյան Հայաստանի սահմանները: Բաղեշի հովտից մինչև Տելեքոաս գետը (Լիզ կամ Կորի ձոր) Քսենոփոնի մոտ միայն Հայաստան է: Տելեքոաս գետի մոտ արդեն նշվում է արևմտյան Հայաստանի մասին: Ելնելով այն տեղեկություններից, որ Տիրիքագոսը հույներին հետապնդում է մինչև Եփրատի (=Արածանի) վերին հոսանքի շրջանը, ապա Արածանիի վերնագավառը նույնպես մտել է արևմտյան Հայաստան վարչական միավորի մեջ: «Ամաբասիս»-ի վերջում նշվում է, որ Տիրիքագոսը փասիանների, հեսպերիտների տիրակալն էր: Փասիանները տեղադրվում են Բուսեանում, իսկ հեսպերիանները` Սպերի շրջանում: Տիրիքագոսի ենթակայության տակ գտնվել են նաև տառիսները, քանի որ վասիանների երկրից` Բասեանից. դուրս գալուց հետո, հույները մտան տառիսների երկիրը` Տայք: Համաձայն Քսենոփոնի, Տիրիքագոսն ուներ և՛ իր զորքը, և՛ վարձկան խալուրդներ ու տառիսներ: «Վարձկաններ» բառը վերաբերում է միայն խալուրդներին, քանի որ տառիսները մտնում էին Հայաստանի մեջ: Այսպիսով, «Ամաբասիս»-ի տեղեկություններից երևում է. որ արևմտյան Հայաստան հյուսիսարևմտյան ընդգրկում էր Արածանիի վերնագավառի որոշ հատվածը. միջին և ստորին

հոսանքների տարածքները, Բասեանը, Տայքը, Սպերը: Անշուշտ, այն
ունեցել է սովկի մեծ սահմաններ, հատկապես արևմտյան ուղղությամբ.
սակայն Քսենոփոնն այդ մասին լռում է: Արևելյան Հայաստանն էլ, որի
սահմանների մասին տեղեկություններ չկան, պետք է տարածվեր
Արածանիի վերնագավառից, Տայքից և Բասեանից արևելք:

Հույները Տելեքոսսի շրջանից անցնում են տասնհինգ փարսախս և
հյսսնում մի ապարանքի, որտեղից հույներն ամայի
տարածություններով ընթանում են ևս տասնհինգ փարսախս, հասնում
Լփրատի (=Արածանի) ակունքների մոտակայքը և, մինչև պորտը
թրջվելով, գետանցում կատարում: Այնուհետև, խոր ձյան և դաշտի
միջով հույներն անցնում են տասներեք փարսախս և էլի ինչ որոշ
տարածություն և իջևանում հայկական գյուղերում: Հետաքրքիր է
հետևյալ տեղեկությունը. «...զինվորներից մմանք ետ էին մնում, և
տեսնելով ինչ-որ սև տեղ, որն առաջացել էր ձյան վերանալու
պատճառով, նրանք ենթադրեցին, թե ձյունը հալվել է, և իրոք այն հալվել
էր մոտիկ անտառածորում գտնվող աղբյուրի հետևանքով, որը զուրըշի
էր արձակում»: Աղբյուրը մասնագիտական գրականության մեջ
նույնացվել է Վարչակի ջերմուկներին: Նշանակում է, հույներն անցել են
աշխարհացույցյան Ծաղկոտն գավառի տարածքով⁴ և, հավանաբար,
ապաստանում են աշխարհացույցյան Բագրևանդի գյուղերում, որտեղ էլ
Խերիստփոսի և Քսենոփոնի՝ թե այդ ի՞նչ երկիր է հարցին, գեղջավազը
պատասխանում է, թե Արմենիան է և հարևան երկիրը խալյուրների
երկիրն է: Փաստորեն, փասիանները և տառիսները գյուղապետի համար
հայեր էին և միայն խալյուրներն էին այլազգիներ⁵:

Բագրևանդից հույները շարժվում են գեղջավազի ուղեկցությամբ,
որը մոտ տասնհինգ փարսախս շեղում է նրանց ճանապարհը,
հավանաբար, դեպի արևելք: Գեղջավազի փախուստից հետո հույներն
«այնուհետև առաջ գնացին յոթ կայան՝ օրական հինգ փարսախս, Փասիս
գետի մոտ... Այստեղից առաջ գնացին երկու կայան՝ տասը փարսախս և
յեռնանցքով դաշտ իջնելիս նրանց դեմ ելան խալյուրները, տառիսները և
փասիանները»: «Փասիս գետի մոտ» արտահայտության փոխարեն
ճիշտ կլինի «Փասիս գետի երկայնքով» թարգմանությունը, քանի որ
հասնելով գետին, հույները պետք է շարժվեին հոսանքին հակառակ
ուղղությամբ և ակունքներից ոչ հեռու անցնեին գետը: Ըիշտ է.
Քսենոփոնը չի նշում Փասիսի ակունքներն անցնելու մասին, սակայն

Փասիս-Երասիսի պես մեծ գետը նրանք պետք է անցնեին ակունքների շրջանում, ինչպես անցել էին Տիգրիսը (իմա՝ Բաղեշը), Եփրատը (իմա՝ Արածանին)։ Հույները, հավանաբար, Երասիսն անցել են պատմական Վաղարշավանի շրջանում, որտեղ ուշ ժամանակներում հայտնի էր Հովվի (Քյոփրիքյոյ) կամուրջը՝ Մուրց գետի Արաքսի մեջ թափվելու տեղում։ Թերևս այն ժամանակներում էլ լինեք փայտե կամուրջ։ Լեռնանցքով դաշտ իջնելիս հույների դեմ ելնում են խալուբները, տառխները և փասիանները, որոնք թվարկված են հարավից հյուսիս։ Քանի որ հույները Երասիսը անվանում են Փասիս աջ ափից, ուրեմն փասիանները բնակվել են նաև գետի աջափնյակում, ինչպես աշխարհացույցյան Բասեան գավառը տարածվում էր Երասիսից և հարավ, և՛ հյուսիս։ Փասիանները տարածվել են գետի աջ ափին և զբաղեցրել են ինչպես բուն Բասեանը, այնպես էլ Անփայտ Բասեանը՝ Վանանդը։ Ներկայիս Փոթի քաղաքի շրջակայքում փասիանների երբեմնի գոյությունը ցույց է տալիս, որ փասիանները Հայաստան էին եկել Կովկասից և սկզբնապես հաստատվել Անփայտ Բասեանում և աստիճանաբար տարածվել դեպի հարավ Բասեան։ Փասիանների երկրից հույները անցնում են տառխների երկիրը։ Ամենաերկար ճանապարհը Հայաստանում հույների համար տառխների միջով անցնող հատվածն էր (շուրջ 200 կմ), որը պայմանավորված էր երկրի դժվարանցանելի բնական պայմաններով։

Տառխների և փասիանների սահմանը ձգվել է Մեծրաց լեռներից հյուսիս, Կարմիր-Փռուակ լեռներից արևմուտք։ Տառխների երկիրը հետագա Տայքն է՝ նախկին Դայաենի-Դիաուխին, որն ընդգրկել է ներկայիս Էրզրում քաղաքի շրջանը և Եփրատի վերնագավառը և, հնարավոր է, Արմինի-Հավնունիքը⁶։ Ելնելով այն իրողությունից, որ Հերոդոտոսը Եփրատի ակունքները տեղադրում է Հայաստանում (I, 180), ուրեմն Դիաուխիի տարածքը համարվում է Հայաստան, իսկ Քսենոփոնի մոտ էլ փասիանների և տառխների երկրները Հայաստան են։ Հավանաբար, Բասեանում և Անփայտ Բասեանում փասիանների հաստատվելուց հետո տառխները հետ էին քաշվել հյուսիսային ուղղությամբ և Դիաուխիի ու Տայքի միջև լրիվ նույնացում չի կարող լինել. օրինակ, Եփրատի վերնագավառը ավելի ուշ գտնվում էր աշխարհացույցյան Բարձր Հայքի կազմում։ Տառխների երկրից հույները մտնում են խալուբների երկիրը և դուրս գալիս Հայաստանից։

Սակայն բնական պայմանները թույլ չեն տալիս հույներին խայտուքների երկրով Կղարջքով, դուրս գալ Սև ծով և նրանք հարկադրված խայտուքների երկրից անցնում են Հարպասոս-Ճորմիս գետը. և մտնում սկյութենների երկիրը և նրանց երկրով ընթանում քսան փարսախ՝ հարթավայր տեղերով դեպի գյուղերը: Ըստ Քսենոփոնի՝ «այստեղից նրանք անցան շորս կայան՝ քսան փարսախ, դեպի մեծ, բարձավաճ և մարդաշատ մի քաղաք, որը կոչվում էր Գյումնիաս»։ Կղարջքից անցնելով Ճորմիս, հույներն իրենց ճանապարհը շարունակել էին Ճորմիսի ծախ ավազ: Հույները նախ մտել էին «աս» սկյութների (Պլինոս Ավագի սակասանները, VI. 11, 29) երկիրը՝ Ասեաց վտր գավառը⁷, որից հետո շարունակել էին ճանապարհն արդեն Քսենոփոնի հիշատակած թշնամի սկյութենների երկրով: Քսենոփոնը նշում է, որ փասիանների և հեսպերիտների տիրակալը Տիրիբագոսն էր: Հեսպերիաները, որոնք իրենց անունը թողել են Սպեր գավառանվան մեջ (Ստրաբոնի Իսպիրադիսը, XI. 14. 9), ոչ մի դեպքում չեն կարող նույնանալ սասպերներին⁸: Սկյութեններ-խալդայներ անվանումը⁹ հավաքական հասկացություն է, որի մեջ մտնում էին ասերն ու հեսպերիտները (իմա՝ ասպերները): Հույները՝ անցնելով Ճորմիսը, կրկին մտել են Հայաստան և այդ մասին չեն իմացել: Գյումնիասը, որը նույնացվել է Բաբերդին, թերևս, համապատասխանում է Ճորմիսի ծախ ավազին գտնվող Արմանային, իսկ այն վայրը, որտեղ երեք օր հանգստացել էին հույները՝ Ապարանքի շրջանին¹⁰: Եթե Գյումնիասը նույնանար Բաբերդին, ապա Քսենոփոնը պետք է խոսեր այդ շրջանից Ճորմիս գետը հաղթահարելու մասին, որը շատ հարմար էր գետանցման համար: Բայց փաստորեն մահն հիշատակություն չկա և այս անգամ հույներն անցել էին գետը Կղարջքից և դրանով խախտել էին ակունքների շրջանում գետերն անցնելու «ավանդույթը»: Կարևոր է նկատի ունենալ, որ հույները, եթե Կղարջքից ճանապարհը շարունակեին Ճորմիսի աջ ավազ, ապա նորից կմտնեին տառիների՝ երկիրը, ինչի մասին հիշատակություն չկա: Չնայած հեսպերիաները հիշատակվում են որպես Տիրիբագոսին ենթակա ցեղ, այդուհանդերձ հույներն անմիջականորեն չեն անցել Սպերի տարածքով և, ըստ երևույթին, նկատի է առնված հեսպերիտ-ասպերների այն հատվածը, որը գտնվել է Ճորմիսի ծախափնյակում և ընդհանուր անունով կոչվել է սկյութեններ: Սկյութենների երկրից հույները մտնում են մակլոնների երկիրը և դուրս գալիս Հայաստանից:

Այսպիսով, «Անաբասիս»-ի վկայությունների քննությունը ցույց է տալիս, որ Սատրապական Հայաստանը կամ XIII սատրապությունը Քսենոփոնի ժամանակ շարունակում էր մնալ Աքեմենյան Պարսկաստանի խոշոր և բարգավաճ նահանգներից մեկը, որի բնակչությունը հիմնականում կազմում էին հայկական ցեղերը:

HOVHANNES KHORIKYAN

(IOS)

ON SOME PROBLEMS OF THE HISTORICAL GEOGRAPHY
OF SATRAPIC ARMENIA ACCORDING TO ANABASIS

The analysis of Anabasis informations shows that Satrapic Armenia or the 13th Satrapy in Xenophon's time was one of the largest and richest parts of the Achaemenian Empire and was mainly inhabited by the Armenian tribes. According to Xenophon the 13th Satrapy under the reign of the Satrap was divided into two subdistricts: Western Armenia and maybe Eastern Armenia, which were ruled by subgovernors.

ԾԱՆՈԹԱԳՐՈՒԹՅՈՒՆՆԵՐ

1. Քսենոփոն, Անաբասիս, թարգմ. Ս. Կրկյաշարյանի, Եր., 1970, էջ 81: Այս և հաջորդիվ մեջբերումները, որոնք առանձին հղումներով չեն տրվի մեր կողմից, ներկայացվում են ըստ սույն հրատարակության:
2. Հարությունյան Բ., Սեծ Հայքի վարչա-քաղաքական քաժամման համակարգն ըստ «Աշխարհացոյց»-ի, Եր., 2001, էջ 273-274.
3. Նույն տեղում, էջ 274-275:
4. Վարչակի ջերմուկները գտնվել են, ըստ Ղազար Փարպեցու, Ծաղկեռտն (իմա՝ Ծաղկոտն) գավառում, որտեղ հանգստանում էր հայոց ապստամբ զորաբանակը (տե՛ս «Ղազարայ Փարպեցույ Պատմութիւն Հայոց, թուրք առ Վահան Մամիկոնեան», քննական բնագիրը Տեր-Մկրտչյան Գ. և Սալխապյան Ստ., Եր., 1982, էջ 320): Վարչակի ջերմուկների մոտ է գտնվել, հավանաբար, Փավստոս Բուզանդի հիշատակած Շահապիվանը՝ Արշակունիների բուն բանակատեղին, և մուրտաստանի աղբյուրները (տե՛ս «Փաւստոսի Բիւզանդացույ Պատմութիւն Հայոց», բնագիրը Զ. Պատկանյանի, Եր., 1987, էջ 188): Թերևս այս մրտենիների անտառը Քսենոփոնի նշած անտառաձորն է:
5. Հարությունյան Բ., նշվ. աշխ., էջ 96:
6. Арутюнян Н., Топонимика Урарту, Ер., 1985, с. 70-71.
7. Հարությունյան Բ., նշվ. աշխ., էջ 98-99:

8. Սասպեյրների մասին տե՛ս Խորիկյան Հ., Հերոդոտյան սասպեյրների տեղորոշման հարցի շուրջ. Հանրապետական գիտական նստաշրջան. Նյութերի ժողովածու. Գյումրի. 2008, էջ 138-142:
9. Խորիկյան Հ., Արեմենյան Պարսկաստանի XIX սատրապության էթնիկական կազմի վերաբերյալ, «Բանբեր Երևանի համալսարանի», թիվ 2, Եր., 2006, էջ 117-120:
10. Հարությունյան Բ., Հայաստանն ըստ «Աշխարհացոյց»-ի և այլ աղբյուրների. քարտեզ. Եր., 2001: